

Naskanyam Petro Leta Petromna Iriki Naskanyam Ju Riga Wa pilwa Leta Isipkita Yitkak

Onggityam leta irika riga re Petrote. Ton re yipa Yesumna itmikitijog riga e. I ton itemb leta yirikonj re Ju riga wa pilwa na yepiya re wetaweta auki wekenonj bargubo gatabind Asiya wingirind.

Si opimemb gar ke utkunda rigap kea bebig dide b'isadrena mile akatenento towaina gar ke utkunda mile map. Si onggit mop penaemb ket itemb Petro leta yerik ten ugowam. I ton kwa nonony amneniny ridede na Yesu towa map b'idgotnena yokatonj, dide ket il angkiny Godind nony ijawa kima Tina wingata yimta undokam. Mop nokip Godit ten abagenjinonj Tina riga awowim, dide Keriso kea b'idgotnena yokatonj dide towa mana uj awonj.

Si Petro insimemb ji gar ke utkunda riga amneniny da, “Win b'ogla yina yirkokarind wekene!” I kwa ten yit amneniny ridede im gar ke utkunda milend wimena tuweny onggit negirjog gowukoyind dide warim b'ogil isma owama iyenyi.

Simesime Yitkak

¹⁻² Simesime! Kon re Yesu Kerisomna itmikitijog riga Petroten. I Kon itemb leta yiriken re God ma obagiki gar ke utkunda riga wa pilwa e yepim re win waina tungg ke wereni riga wetaweta

wekenyit de Ponto eriya, Galatiya eriya, Kapadokiya eriya, Asiya eriya, i Bitiniya eriya wingirind. I win re onggityam riga im yama na re Abu God kea naska nata wanim wumir awonj, i abagikinonj, i ket Yinayina Wingawingat onggit gowukoi ke wetaweta amnikinonj yina omnenam, mop nokip ingkaemb win Yesu Kerisond utkunja, dide Ton Tina kus ke isanka teyeniny kilkesa omnam. Si Godimna wurar dide ngimbla wa pilind ukoijog b'usmurena yeken.

Ngirpu kesa Yirkokar Okatam Warim B'ogil Isma

³ Men Godind yasourenu yete re mera Yonggyam Yesu Kerisomna B'u. I Ton Yesu Kerisond yutnyitonj uj ke, i ingkenaemb Ton Tina ukoijog kear ke men nomninonj b'usaya ukendam. Nokim da idenat men b'ogla okasu dadal ngirpu kesa yirkokarimna warim b'ogil isma. ⁴ I kwa idenat men b'ogla pumb tunggimna b'ogil gasa owabinta riga taindam rinsim ra maka titkikanj, i negir taukanj, i dide b'utuwokikanj. Godte onggityam b'ogil gasa wanim awaminy pumb tungg wa. ⁵ I win gar ke utkunda yokatenya, i ingkaimemb God Tina danda ke wen yirgong amnikeneniny. Mop nokip Ton singi na da win okasya dadal ngirpu kesa yirkokar rinte re ongonjeni yibim pita omnam gowukoi kikitum winind. ⁶ Si onggit paemb nangga ma ji rada win opima yu sobijog ganggand gar kopa akatenindam b'engabenga wip b'idgotnena ke, aji win ukoijog sam im ainindam. ⁷ Nokim da ra win onggityam b'idgotnena wip tawarkenindam, idenat odede otonkena nya ke waina gar ke utkunda kukip ke iminjogim

taukanj. I kukip bilbiljog gold re b'ogiljog gasa e onggit gowukoyind, si onggit paemb rigap opima gold wul wa aramkenenanj dide aklekenenanj au b'iskokam dide kukip bilbiljog gold omnikam. Aji nangga ma ji rada ton opima odede otonkenanya ke kukip bilbiljog gold akatenanj, si opimemb komkesa gold opima negir taukanj dem. Aji onggityam waina iminjog gar ke utkunda re b'ogiljog e, aji ma ija e it re kukip bilbiljog gold re dide. Mop nokip ra Yesu Keriso pita tainy dem, God opima wen tasoureniny dem i wa b'ogil inyomarena takainy dem i dide wen tesnainy dem onggit waina iminjog gar ke utkunda map. ⁸ Win maka Yesu Kerisond yir yongonda, aji win Tin gar ke singi yiyenya. I kwa yu win ma ita Tin yir ongong yiyenya, aji win Tin gar ke utkunda ke yokatenenya. Si win ingkaemb isipkita kesa dide b'ogil inyomarena kima ukoi-jog sam yomnikenenya. ⁹ Mop nokip win ita yokatenenya gar ke utkunda milemna isma. Si onggityam isma itemb re wingawingamna dadal ngirpu kesa yirkokar e.

¹⁰ I bageyamip kea naska nata bage yiyeneno onggit wurar gatab rinte ra God wa takainy dem. I ton kwa onggit dadal ngirpu kesa yirkokar okatam gatab ma sobijog na oraka yiyeneno, dide b'arkena kima wuwenonj b'obogil ongwatam. ¹¹ I Kerisomna Wingawinga kea towa pilind b'imuri yibnenenonj. I Ton ket naska nata towa yir ungata yit pitapita amnenainonj da, "Kerisom pilind ita b'idgotnena i onggit kak ke ita b'ogil inyomarena." Si bageyamip ket b'arkena kima wuwenonj b'obogil ongwatam da, "Nangga win

nasim gasa taukanj, dide ridede wip win e pita tainy dem?” ¹² Aji God bageyam wa pitapita amnenainonj da, ton onggityam bage yit apurento re ma towanim mana aji wanim mana. I God yitmikitonj Yinayina Wingawingand pumb tungg ke towa pilwa yepim re wa God ma b'ogil yirkokar bage yit pitapita amnenauranj. Si yu win towa pilkaim utkundenindam onggityam bageyam waina opureni yitkak. I anerup kwa ukoi singi im aenanj yir ongongim onggityam bageyam waina opureni yitkak kuna b'ugongnena kima.

Yina Wimenam Ara B'emoka

¹³ Si onggit paemb win b'ogla waina nonykok danda kima b'obogil ongapa teyenindam dindim wimenam, dide nonykok ipangka teyenindam b'obogil nony aukam. I win ket b'ogla kupkakupka nonykok kima waina warim b'ogil isma taramisindam onggit wurarim pilind rinte ra God wa tetiyainy dem, ra Yesu Keriso pita tainy dem. ¹⁴ Naskand re win Godimna wurar gatab wumir kesa na wekenot, win waina gim ke negir mile singi nat wuwenot. Aji win goro odede yirkokarind tekenim rija na re naskand wekenot. I yu win re Godimna b'iga im, si win Tina b'iga pila na utkunda kima wimena tuwenyit. ¹⁵ I God yet re wen ara emokinonj, Ton re yinayina e. Si widaka b'ogla walenggyam yina tainindam komkesa waina omnika mile wingirind odede it re God re dide. ¹⁶ Mop nokip yina peband ija emb ji iriki yibim da, “Win yina aininam, mop nokip Kon re yinayina en.”

¹⁷ I God riga esagikeneniny re ma bu b'iyna kima e, aji riga yipayipa omnika ririr nasim. Si ra win itemb Godind B'u ke nyi ogenaya, win b'ogla waina yirkokar b'obogil tengaenindam Tin moga kima isnawam waina onggit gowukoi obai wimena wingirind. ¹⁸ I win wumir im da win naska yokatenenonda re wa b'uhwar wa pilke b'isateni mogji kesa negir wimena mile na. Aji Godit yoramitonj waina negir mile eomnena mira wen itraram onggityam waina mogji kesa negir milem pilke. Si itemb mira re ma ija e it re negir aukam gold o silba re dide. ¹⁹ Aji Kerisomna ukoi jog isnawa kima kus kena mira yoramitonj. I Kerisom pilind awir e kwa b'injawa mile dide Ton re kilkip kesa e ija e it re Godim pilwa si omniam kilkip kesa mamoi re dide. ²⁰ I re God maka gowukoi yotobarkonj, Ton get kena Kerisom wumir awonj obagendam. Aji onggit gowukoi kikitum winind God wanim b'ogilim Tin pita yomnonj. ²¹ I Keriso kea nya yipangendonj, si ingkaimemb win Godind gar ke yokatenya yet re Tin yutnyitonj uj ke dide Ti yokawonj b'ogil inyomarena. Si onggit penaemb da idenat waina gar ke utkunda dide warim b'ogil isma ra Godim pilnasim tekeny.

²² I win Godimna iminjog yitkak im yimta undokenenindam. Si ingkenaemb waina wingawinga kilkip kesa aukito, ngirpu win iminjog nanyingganwar pila gar ke singi b'iyenindam gar ke utkunda nany dide yingganwar wingirind. Si onggit paemb win b'ogla b'obogil iminjog kilkip kesa gar ke singi b'itiyenindam walenggyam walenggyam. ²³ Mop nokip win b'usaya

ukuktondam re ma onggityam tuny kena rinte ra titik, aji onggit tuny kena rinte ra ma ita titik. Si itemb tuny re God ma yilo yitkak e rinte re dadal ngirpu kesa yibneneny. ²⁴ Si onggit paemb yina peband ija emb ji yindenya da,

“Komkesa rigaina ji re ija e it re tib nangg re dide,
i komkesa rigaina b'ogil inyomarena re ija e it
re tib popo re dide.

Itemb tib nangg ita yarimyarim tawik,
dide opimemb tib popo opima tisokanj.

²⁵ Aji Yonggyamimna yitkak ibneneny ra dadal ngirpu kesa e.”

Intemb ji God ma b'ogil yirkokar bage yitkak rina re rigap wanim pitapita yomneneno.

2

Singi Iyena Wingawinga Ngom Mebo!

¹ Si onggit paemb win wa pilke awaikurinam komkesa negirjog mile, i komkesa b'anyginena mile, i gim ke b'ogil aji ngor wa negir mile, i nonyik b'iponena mile, i dide

komkesa negir yit opurena mile. ² I win wumir im da sisil ukendi b'igap opima singi eyenanj towa mogwar waina ngom mebo. Si widaka b'ogla odede wip ukoi singi tainindam God ma iminjog kilkip kesa yitkakim pilind. Nokim da idenat win towinkindam, ngirpu okasya dadal ngirpu kesa yirkokar. ³ Si rada win kemb met yotonkisyda da Yonggyam re otomanti e, win b'ogla God ma yitkak odede singi iyenya.

Yirkokar Motir Yesu

⁴ Si metkim onggit Yonggyamim pilwa. Ton re dadal yirkokar Motir e yena re rigap yisayo da ma ita b'ogil Ti pilind, aji God yobagendonj re ukoi jog isnawa kima Riga na. ⁵ I ra win tuyit Ti pilwa, wida kwa kea odede yirkokar Motir pila im wip aindam. Si God wen aranginy re wingawinga nya kaim met oranga re dide, ngirpu win yina si riga aukindam. I kwa ra Yesu Keriso kima win teyenindam Godim pilwa wingawinga si gasa rinsim ra God sam kima temjiny. ⁶ Si onggit paemb yina pebat onggit gatab yit ija emb ji yindenya da,

“Yir de, Kon yobagendond yipa met wugind oramiti iminjog isnawa kima Motir,
i ita Kon itemb motir oramisin de Siyon wa met orangam.

I yet ra Tin gar ke utkunda ke okas, ton makwa ita ingar tainy.”

⁷ Si onggit paemb itemb Motir re iminjog ukoi isnawa kima e ainy towanim yepim re Tin gar ke utkunda ke yokasi. Aji towanim yepim re maka Tin gar ke utkunda ke yokasi, ija emb ji towanim yit da,

“Yipa Motir rina re met oranga rigap b'isayo,*
aji re ket God yimta ke met wugjogind yoramitonj onggit met emorkam.

Si Ton ket iminjog isnawa kima Motir na awonj onggit met oranga wingirind.”

⁸ I kwa yindenya da,

“Ton re towanim ombombrenapu Motir e dide sap otendenapu Kila e.”

* **2:7:** Onggityam yit yisipkeny re Ju riga waina wip iyoi rigap Yesund yisayo.

Ton ombombrena im wuweneny, nokip ton ma opima God ma yit gar ke utkunda ke akatenenanj. Si itemb mile re God ma isamki e towa pilind aukam.

⁹ Aji win re Godimna obagiki riga im, i yina si riga im mera King Godim wipind, i yina gu riga im, i dide Tinajog riga im. I God wen ara emokiononj sibibim pilke opekam de Tina otomantijog inyomarena ngayam pilwa. Mop nokip win idenat pitapita tamnenindam onggityam b'ogil mile rina re God wa amnikainonj. ¹⁰ Naskand win re ma Godimna riga na wekenot, aji yu win re ket God ma riga im aindam.

I naskand win re God ma kear okati kesa riga na wekenot, aji yu win re ket God ma kear okati riga im aindam.

Godimna Wiko Rigaina Mile

¹¹ Kor rigawar yena re kon singi eyeninyin! Kon wen tugoinyin yepim re win wekenyit onggit gowukoyind obayam dide b'asmarena riga. Si win b'ogla b'agoka tuwenyit gim ke gowukoi rigamna negirjog singi wa pilke rinsim re geja yomnikenenyi waina wingawinga wa pilind. ¹² I win b'ogil wimena mile na takasindam gar ke utkunda kesa riga wa wingirind, nangga ma ji rada ton opima wa gatab negir yit apurenenanj odede da, "Win re negirjog mile omnika riga im." Nokim da ra ton yir ongong teyenanj waina b'ogil omnika mile, si idenatemb ama rika todaka Godind esourenyi dem onggit bibirind ra Keriso orontam notupiny dem.

¹³ I win b'ogla Yonggyam map walenggyam b'atkaindam komkesa wip iyoi riga wa pilwa

rina re rigap danda agonto onggit gowukoyind. Odede riga wa pilwa opi re king yena re God aramkinonj pumbjog pipmetind, ¹⁴ i gabmani mopyam rina re God etmikisinonj kingimna danda kima ti wirand wiko omnikam. Nokim da idenat ton gabmanimna gog ke negir ma b'isagika oramitenenyi towa pilwa yepim re negirjog mile amnikenenanj, aji ton kwa ten tasourenenanj yepim re b'ogiljog mile amnikenenanj. ¹⁵ Mop nokip Godimna singi ija emb ji da win odede b'ogiljog mile tamnikenindam, i ingkaimemb win teswangnenindam onggityam korirkorir riga towaina wumir kesa negir opurena kima mile. ¹⁶ Si win b'ogla wimena tuwenyit b'itrari riga re dide. I win goro ingaena waina b'itrari mile negir mile utwangkam. Aji win b'ogla wimena tuwenyit Godimna wiko riga re dide. ¹⁷ Si win b'ogla isnawa teyenindam komkesa riga. I win b'ogla iminjog nanyingganwar pila gar ke singi teyenindam gar ke utkunda nany dide yingganwar. I win b'ogla Godind ukoi moga kima isnaya. I dide win b'ogla waina kingind isnaya.

Kerisomna B'idgotnena gatab Wingata

¹⁸ I rigaina met yir ipka wiko riga, win b'ogla kupkakupka moga dide b'isnawa kima b'atkaindam wa yonggyamwar wa pilwa. I win goro towa pilwa nena b'atkaindam yepim re kear kima dide musik isnawa nony kima b'ogil mile riga, aji kwa towa pilwa yepim re nonykok kaokao kima bebog mile riga. ¹⁹ Mop nokip yet ra maka nanggamog negir omnik, aji ra ton negir b'idgotnena okas kopa kima, nokip ton

kea yimjas da itemb re Godimna kukip ke singi e, si itemb tina mile re Godimna okai b'ogil sam kima wurar gasa e. ²⁰ Si ringma? Ra win negir mile tamnikenindam, i ngirpu rigap wen iraska teyenanj, i dide musik wimena tuwenyit onggit b'idgotnena wingirind, si nanggamog b'ogil e yibim waina okati b'idgotnenam pilind? Aji ra win b'idgotnena takatenindam b'ogiljog mile omnika map, i ket musik wimena tuwenyit onggit b'idgotnena wingirind, itemb re Godimna okai b'ogil sam kima wurar gasa e. ²¹ Mop nokip God wen ara emokinonj re odede mile omnika manaemb. I nok paemb ji da kemb Keriso b'idgotnena akateninonj wa map, i ingkenaemb ton wingata mile wa erarkainonj, nokim da idenat win tina lomena yimta tundokenenindam.

²² I ton makwa yipa negir mile yomnikonj,
i rigap makwa yipa b'anyginena yit yodarawo
Tina tugimind.

²³ I rigap Tin negir yit ke yomneno, aji Ton maka negir yit ke mira amneninonj. I rigapiya Tin b'idgotnenand yoramiteno, aji Ton maka miram atonkeninonj ten negir onnam. Aji Ton Ti gatab bebig aramisinonj Godim yimind yete re negir kesa dimdimjog b'isagika yomnikeneny.

²⁴ I Ton meraina negir mile kawarind eyinonj Tina ji kumbind, i b'uwonyitonj wul b'agbagind. Nokim da idenat men negir mile ke tewaikisindam, i ket negir kesa dimdimjog milend wimena tuwenyin. I re Ton kus kima iraski yira akasinonj, si ingkaimemb win kopa ke isakendi wekenyit.

²⁵ Mop nokip win re naskand mamoi pila na nya yesungaenenonda, aji yu win kemb itekindam

Ti pilwa yete re Godimna mamoi yir ipka riga dide sosi yir ipka riga yibim. I Ton opima waina wingawinga b'obogil yir ipka eyeniny.

3

Molkongga Wimena Yirkokar Yit

¹ Leo kima kongga! Widaka odede yipa wip nya ke b'ogla b'atkaindam wa leowar wa pilwa. Nokim da ra ninda leowarip maka God ma yit gar ke takatenanj, i towa konggawar waina yit opureni kesa b'ogil wimena milep ten amaya opima nony tajomkanj, si idenat todaka ket gar ke takatenanj God ma yit. ² Mop nokip ra win konggap moga kima Godim pilwa odede yina b'amnena mile dide yit opurena kesa b'ogil mile tamnikenindam, si ingkaimemb wa leowarip waina odede b'ogil mile yir tangranj. ³ Si win goro gim ke b'ajga tuwenim odede jiwim plas gasa kima opi re mopngii b'ijobika ke, i ninda gold jag oramita ke, i dide ukoi mira kima b'ogil kobirgim b'ikita ke. ⁴ Aji win b'ogla b'ajga tuwenyit garind kukip rigam pilind odede itkika kesa mile ke osi re nony kima musik wimena mile ke dide mimkam nonykok kima mile ke. Si God odede mile kima riga agenainy re ukoi-jog isnawa kima im. ⁵ Mop nokip naska winind kwa yina konggap yepiya re Godim pilind warim b'ogil isma aramkenento, todaka odede yipa wip mile kena towalenggyam b'ajga wuwenenonj. Si ton odede mile kena towalenggyam towa leowar-jog wa pilwa b'akaenento. ⁶ I Sara daka odede mile kenaemb ti leo Abraamind yit yutkundenenonj, i tin yogenayonj da, "Kor yonggyam". Si win b'ogla

b'ogiljog mile tamnikenindam. I nangga ma ji rada wa leowarip wa wipind nanggamog moga kima mile tamnikenenanj, win goro moga aena tuwenyit. Si ingkaimemb win Sarnamna ngimngai b'iga aukindam.

⁷ I wida kongga kima riga b'ogla odede yipa wip nya ke b'obogil b'angwatena kima yipand wimena tuwenyit waina konggawar kima. Si win b'ogla tangwatanindam wa konggawar da ton re ma danda im, i kwa win ten tesnaenindam, nokip God kea towanim wurar akainonj wanim re dide, i ton ita yirkokar yipand gilgil owabindenyi win kima. Nokim da ra win odede mile tamnikindam, idenat maka nanggal waina yir opmita tagokiny.

Negir kesa Dimdimjog Mile map B'idgotnena

⁸ I kon kikitumam nitinjin. Komkesa win b'ogla yipand nony menamena tamnikindam, i win b'ogla walenggyam walenggyam kear ke b'atkatendindam, i win iminjog nanyingganwar pila gar ke singi b'itienindam gar ke utkunda nany dide yingganwar wingirind, i win b'ogla riga kear tamnenindam, i dide win b'ogla walenggyam gou wa tainindam. ⁹ I win goro ten negir mile ke mira tamneninam yepim re negir mile ke wen amnenanj. I goro negir yit ke mira tamneninam yepim re negir yit ke wen amnenanj. Aji win b'ogla wip tengenjindam ten b'ogil yit ke nena omnenam. Mop nokip God onggit manaemb wen ara emokinonj, nokim da idenat win Godimna b'ogil owabinsya. ¹⁰ Si onggit paemb yina pebat ija emb ji yindeny da,

“Yet ra singi tainy sam kima yirkokar wimenam

dide b'ogil wimena win okatam,
ton b'ogla ogoka yeyen tina weyat negir yit opuren-
nam pilke,

dide ton b'ogla ogoka yeyen tina tugim
b'anyginena yit opurenam.

¹¹ I ton b'ogla rengend negir mile ke, i ramnikin
b'ogil mile,

i dide ton b'ogla yarak ngimbla dide yimta
yendok itemb ngimbla okatam.

¹² Mop nokip Yonggyam ita yir yibim de negir kesa
dimdimjog riga wa pilwa,

i Ton re towaina b'arkena wa e yipya b'itkiti
yibim.

Aji Yonggyam negir omnika riga wip ke
awarkeniny re ukoi soro kima b'isagika
mim.”

¹³ I ra win iminjog gar ke singi tainindam
b'ogil mile omniam, si yete singi tainy wen negir
omnam? ¹⁴ Aji rada win opima b'idgotnena

akatenindam negir kesa dimdimjog mile map, si
win re kemb b'ogil omni riga im. Aji win goro

moga tuwadeneniam ten yepim re wen mogam
amnikenenanj. I kwa goro win moga kima kid

b'itpokeninam. ¹⁵ Aji win b'ogla Kerisond wa
Yonggyamim omninya waina garind Tin yina om-

nenam. I riga opima b'arkena wuweneny wa
pilwa wumir okatam warim b'ogil isma gatab rinte

re yibim wa pilind. Si win b'ogla ita winind
b'angonjeni tekenenyit ten mira omnienam. ¹⁶ Aji

win b'ogla mira tamnenindam musik wimena mile
ke dide b'obogil isnawa nya ke. I win b'ogla

tawamindam b'ogil kukip ke nonykok. Nokim da
idenat ninda rigap wen negir yit ke tamnenenanj

waina b'ogil omnika mile gatab rinsim re win amnikenindam Kerisond yimta undokand. Aji ton onggit waina b'ogil mile kaim ingar takatenanj towaina negir opurena gatab. ¹⁷ Mop nokip itemb re b'ogiljog e ra man okatenyit b'idgotnena rada God singi motineny b'idgotnena okatam, mop nokip man b'ogil mile e omnika yiyenyit. Aji mornim ma b'ogil e ra man okatenyit b'idgotnena, nokip man negir mile e omnika yiyenyit. ¹⁸ Mop nokip Keriso daka yipapyam b'idgotnena kima uj awonj, nokim da idenat komkesa meraina negir mile awir tamnikeniny. Ton re negir kesa dimdimjog riga na, aji ton uj awonj re mera mapena yepim re men negir mile kima wekenyin. Nokim da idenat ton men niyiny de Godim pilwa. Si ton uj awonj re ji kena, aji ton yilo yokatonj re Yinayina Wingawinga kena. ¹⁹ I onggit Wingawinga danda kena Ton yikonj dide yit pitapita amnenainonj wingawinga wa pilwa yepiya re sibibmetind wekenonj. ²⁰ Opimemb wingawinga re Godim utkunda kesa na wekenonj, re Nowam winind God ten ukoi singi kima yir ungauka eyeninonj mimkam wimena kima towanim engendam Ti pilwa. I onggit Godimna yir ungauka wingir nat Nowa ukoi giga oranga yiyenonj. Si re onggit winind ngiwir ikonj, ma jog rigapiya yirkokar yokato onggit nyiwim pilke, aji ina eit (8) riga nena. ²¹ I itemb nyi re kwa yu wanim yirkokar okatam iminjog outinti mal e it re baptiso. I itemb re ma ji ke kil awir omnam e, aji b'ogil kukipind nonykok ke iminjog imjati yitkak opurena e Godim pilwa. Mop nokip Yesu Keriso kea utnyitonj, i onggit paemb win itemb bap-

tiso iminjogim yomnanya. ²² I Yesu Keriso kea yikonj de pumb tungg wa, dide ket juwai kima pipmetind yibim Godimna yimjog yim tab ke. I anerup i pumbind wip iyena rigap i dide pumbind danda rigap opima Tina b'ingawa yit wirand b'akaenenanj Ti pilwa.

4

Engendi Rigaina Wimena

¹ I Keriso kea ji ke b'idgotnena yokatenonj. Si onggit paemb widaka b'ogla okatenya onggityam Kerisomna nony menamena nya, nokip yepiya ra ji ke b'idgotnena okatenyi, ton onggit b'idgotnena wingirind seg rainem negir mile omnika. ² Nokim da idenat win ket maka wimena tuwenyit rigaina gim ke singi milend, aji Godimna singind waina ji ke yilo wimena wingirind. ³ Mop nokip win naskand kemb ma sobijog na win b'iskoka teitondam God ma obagiki kesa rigaina singi mile omnikam. Si win wuwenenot b'ogil mile negir omnika milend, i gowukoi gim ke negir singi milend, i ikpip milend, i ikpip b'isingkena milend, i on aika diyamdiyam milend, i dide b'anyginena god idol negirjog ewangaya milend. Aji win goro kwa b'usaya tuwenim onggityam mile omnikam. ⁴ Si yu riga yepim re onggit negirjog isanikesa milend wekeny, ton kid kesa im aenanj, mop nokip win ma opima b'ikenindam yipand ton kima onggit negirjog mile wa. Si onggit paemb ton wen negir yit ke esadrenenanj. ⁵ Aji ton opima towinkanj dide towalenggyam tagenairanj dem towaina omniki negir mile Godim pilwa yete re

b'angonjeni yibim yilo riga dide uj riga isagikam. ⁶ Si onggit mop penaemb towada kwa God ma b'ogil yirkokar bage yit pitapita amnenauto yepim re yu uj wekeny. Nokim da idenat ton towaina ji ke yirkokar ujim b'isagika okatenenyi komkesa riga re dide, aji towaina wingawinga yirkokar re yilo im tekeny God re dide.

Godimna Okai Wurar B'obogil Ingaenam

⁷ I yu komkesa gasam win re kea b'undwatapu wus wa e ainy. Si onggit paemb b'ogla win yir b'itkiti dide nony ipangendi na tekenyit yir opmitenam. ⁸ I win komkesa b'ogil mile na tamnikindam, aji ukoi jog re singi b'iyena e. Si win b'ogla kukip ke singi b'itiyenindam walenggyam walenggyam, nokip onggit singi b'iyena milet opima tekangindeniny rigaina jog jog negir mile nony b'edatenam. ⁹ I win b'ogla walenggyam walenggyam b'obogil obayam yir ipka teyenindam, aji goro meka yit kima taeninam. ¹⁰ I God kea wa yipayipa riga agoninonj b'engabenga wip yiyag wurar. I win re onggityam wiko riga im yena re God abagikinonj onggit Tina okai yiyag wurar ke wiko omnikam. Si win wa wingirind b'ogla riga wa b'obogil wiko tamnikaenenindam onggit waina okati wurar ke. ¹¹ Si yet ra opurenam yiyag wurar okas, ton b'ogla rapurenin iminjog God ma oramiti yitkak re dide. I yet ra yim okaenam yiyag wurar okas, ton b'ogla yim rakaenin God ma okai danda ke re dide. Mop nokip ton re Yesu Kerisom pilnasim wiko amnikenenanj, si ingkaemb God b'ogil inyomarena yokateneny onggityam komkesa wiko wingirind. Si b'ogil

inyomarena dide danda Ton kima ngirpu kesa ngirpu kesa, iminjog!

Gar ke Utkunda Rigaina B'idgotnena

¹² Kor rigawar yena re kon singi eyeninyin! Ninda bebigip opima wen atonkenanj, si win ma sobijog gar kopa kima b'idgotnena im akatenindam. Si win goro kid kesa taininam onggit gatab odede nony kima da, “Nangga ongwati kesa bebig gasa im aukanj sowa pilind.” ¹³ Aji win sam na aininam, nokip win opima b'ingaena wuwenyit onggit b'idgotnena wingirind rina re Keriso yokatenonj. Nokim da idenat win ket ukoi-jog sam tainindam dem ra Tina b'ogil inyomarena pita tainy dem. ¹⁴ I ra win negir yit takatenindam Kerisond yimta undoka wingirind, win re b'ogil omni riga im. Mop nokip b'ogil inyomarenamna Wingawinga yete re Godimna Wingawinga, ton re wa pilnate yibneneny. ¹⁵ I yipa rigat goro odede negir mile map b'idgotnena rakasin wa wingirind, opi re onganda mile, o yurowam mile, o negir omnika mile, o minda ninda riga ma pipmet isata mile. ¹⁶ Aji ra win b'idgotnena okatenya Kristiyan mile map, win goro ingar taininam. Aji win kemb Kerisomna nyi kima ogenaya riga im aindam, si win b'ogla Godind yewangaya. ¹⁷ Mop nokip itemb ke b'isagikam win b'atom, naska re gar ke utkunda riga wa pilkae. Si rada God ma b'isagika mera pilke b'atom, ridede wip e towanim b'undwatapu tainy yepim re maka God ma b'ogil yirkokar bage yit gar ke yokatenyi? ¹⁸ I ija emb ji yina peband yindenya da,

“Ra negir kesa dimdimjog rigap ukoi jog bebig
 kima yirkokar okasi,
 si ritamim ta taukanj dem Godind ewangaya
 kesa riga dide negir mile kima riga?”

¹⁹ Si onggit paemb yepiya ra b'idgotnena takatenanj Godimna singi ririrind, ton b'ogla b'ogil mile omnika teyenenanj. I onggit b'ogil mile omnika wingirind, ton b'ogla towaina yirkokar raramiteninem otobarkayamim pilind yir ipkam yete re ten b'obogil yir epkeneniny.

5

Eldamna Sosi Yir Ipka Wiko

¹ Si kon b'ugowa yit nitinjin sosi elda riga wa pilwa yepim re wa wingirind wekeny. Si koda re yipa elda riga en win re dide. I kon re Kerisomna b'idgotnena gatab yir ungata riga en. I dide kon ita okasin b'ogil inyomarena wulpok rinte ra pita tainy dem. ² Si win b'ogla b'obogil yir ipka eyeninam gar ke utkunda riga rinsim re wekeny win kima Godimna sosi wingirind mamoi yir ipka riga re dide. I win goro rigaina il ongka ke ten yir ipka teyendim, mop nokip win b'ogla tamnikindam waina nony ke, aji ukoi singi kima na, mop nokip God wen singi im eyeniny onggityam wiko omnikam. I win goro onggityam wiko tamnikindam wulkip singi kima, aji ukoi jog nony sam kima na. ³ I mera Yonggyam gar ke utkunda riga aramisinonj re wa yim kumb nat. Si win goro pumbjog wa yonggyamim taininam towa wingirind. Aji win b'ogla b'ogil wingata riga na tainindam towanim yimta undokam. ⁴ Si ra

wın odede mile tamnikenindam, wın ita ket b'ogil inyomarena kima dira okasya dem ra mopyam mamoi yir ipka riga Keriso pita tainy dem. Si onggityam waina dira ma ita b'utuwokik dem aji dadal e ibneneny dem.

⁵ Sisil riga! Wıdaka b'ogla odede yipa wip nya ke b'atkaindam elda riga wa. I wın komkesa b'ogla walenggyam walenggyam gou wa tainindam wa wingirind odede wip ringmim re wiko rigap towalenggyam gou wa aukenenanj dıde towaina goujog wiko kobirgim b'ikokenenanj towa yonggyamwar wa wiko omnikam. Mop nokip yina peband ija emb ji yindeney da, “God esaeneniny b'asourena riga, aji Ton wurar agoneneniny towa mim yepim re towalenggyam gou wa aenenanj.”

⁶ Si onggıt paemb wın b'ogla walenggyam gou wa tainindam Godıma ukoi danda kima yım wirand rına re komkesa gasa atobarkinonj i rinsim re ten wip eyeniny i dıde rinsim ra tesagikiny dem. Si ingkaemb ket God wen pumb wa turowasiny dem, ra iminjog wın ik dem. ⁷ I wın b'ogla komkesa waina nony bebig teyenindam i taramisindam Ti pilwa, mop nokip Ton opima wen nonyınd awameneniny dıde yir ipka eyeneniny.

⁸ I wın nony epangendi wekene! Dıde b'obogil yir kima wekene! Mop nokip Satana re waina geja riga e. I ton b'ugumarena yikeneny re ngulam b'anggikena kima e, i oraka eyeneniny riga imkuram odede ringmim re laiyonip b'angga arakenenanj ongongim. ⁹ Si wın b'ogla gar ke utkunda ke danda kima towınkındam Satana kima geja b'iyenam. Mop nokip wın

wumir im da waina gar ke utkunda nany dide yingganwar yepim re wekeny onggit gowukoyind, opima odede yipa wip b'idgotnena urowatena eyenanj win re dide. ¹⁰ Aji win b'ogla onggityam b'idgotnena takatenindam sobijog winind, mop nokip God yete re wa komkesa wurar agoneneniny, Ton wen ara emokinonj Keriso kima yipand awowim dide Tina ngirpu kesa b'ogil inyomarena okawam Keriso Yesumna wurar kima. I Ton Tilenggyam opima wen ririrkip tangonjeniny dem, i wen imninena kesa tawinkiny dem, i wen danda kima termekiny dem, i dide wen jjab kima pipmetind tamorkiny dem. ¹¹ Ukoï danda Ton kima dadal ngirpu kesa, iminjog!

Undwatapu Yitkak

¹² I kon wanim onggityam sobijog peba yiriken re koina nony ijai gar ke utkunda yinggan Silamna yim b'akawa kae. Si kon onggityam peba ke wen ugoinyin i yir ungati yit im pitapita amneninyin da onggityam re Godimna iminjog wurar e. Si win b'ogla owinkinam onggityam yitkak kima. ¹³ I win kima yipand gilgil obagendi sosit rinte re yibim dikind Babilon taunind, wen widaemb yit amniny, dide koina b'iga Mak toda kwa. ¹⁴ I win walenggyam walenggyam simesime aenina yina b'amongnena singi kima. Ngimbla komkesa win kima yepim re Keriso kima yipand wekenyit!

Wipi Yit God ma Yina Sisil Yina Peba
The New Testament in the Wipi Language of Papua
New Guinea

Nupela Testamen long tokples Wipi long Niugini

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 21 Feb 2024 from source files dated 31 Aug 2023

a5a5213a-fb12-52b5-9c99-efb8044c6646